



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ  
ՔՆՆՈՂ ԱՆՁ

ք. Երևան

16.07.2018թ.

Ո Ր Ո Շ ՈՒ Մ

ՀՀ գնումների հետ կապված բողոքներ քննող անձի  
թիվ ՍՑ-ԱՄ-2018/97

Հայաստանի Հանրապետության գնումների հետ կապված բողոքներ քննող անձ Մհեր Անանյանս, ուսումնասիրելով Հայաստանի Հանրապետության ֆինանսների նախարարության 27.06.2018թ. թիվ 03/26-3/11731-18 գրությամբ «Ժակ և Գոռ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

**1. ՀՀ ֆինանսների նախարարության ներկայացրած փաստերը և պահանջը.**

ՀՀ ֆինանսների նախարարությունը, ՀՀ դատական դեպարտամենտի 21.06.2018թ. թիվ ԴԴ-3-Ե-4648 և 26.06.2018թ. թիվ ԴԴ-3-Ե-4774 գրությունների հիման վրա, 27.06.2018թ. թիվ 03/26-3/11731-18 գրությամբ դիմել է ՀՀ գնումների հետ կապված բողոքներ քննող անձին, խնդրելով նախաձեռնել «Ժակ և Գոռ» ՍՊԸ-ին (այսուհետ նաև

Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

## **2. «Ժակ և Գոռ» ՍՊԸ-ի ներկայացրած փաստարկները և դիրքորոշումը.**

«Ժակ և Գոռ» ՍՊԸ-ն ՀՀ գնումների հետ կապված բողոքներ քննող անձին ներկայացրած գրավոր դիրքորոշմամբ հայտնել է, որ «Ժակ և Գոռ» ՍՊԸ-ն մասնակցել է «ՀՀ դատական դեպարտամենտ» ՊԿՀ-ի կարիքների համար՝ տրանսպորտային նյութերի ձեռքբերման նպատակով կազմակերպված «ԴԴ-ԳՀԱՊՁԲ-18/21» ծածկագրով գնանշման հարցման ընթացակարգին (այսուհետ նաև՝ Ընթացակարգ) և 2-րդ չափաբաժնի մասով ճանաչվել առաջին տեղ զբաղեցնող մասնակից:

Այնուհետև, գնման ընթացակարգի գնահատող հանձնաժողովը հարցում է կատարել ՀՀ ԿԱ ՊԵԿ՝ առաջին տեղ զբաղեցրած մասնակցի ՀՀ պետական բյուջեի նկատմամբ ժամկետանց հարկային պարտավորությունների վերաբերյալ:

Ի պատասխան վերոնշված հարցմանը՝ ՀՀ ԿԱ ՊԵԿ-ի կողմից 24.05.2018թ. տրվել է եզրակացություն, համաձայն որի «Ժակ և Գոռ» ՍՊԸ-ն 12.05.2018թ. դրությամբ (հայտը ներկայացնելու օր) ՀՀ պետական բյուջեի նկատմամբ ունի 490 ՀՀ դրամի ժամկետանց հարկային պարտավորություն, որն արձանագրվել է Ընթացակարգի գնահատող հանձնաժողովի 29.05.2018թ. ժամը 12:00-ին տեղի ունեցած նիստի թիվ 6 արձանագրության 2-րդ կետով:

Նույն արձանագրության 3-րդ կետի համաձայն՝ հիմք ընդունելով Կարգի 44-րդ կետը որոշվել է «Ժակ և Գոռ» ՍՊԸ-ի հայտը 2-րդ չափաբաժնի մասով մերժել և նույն չափաբաժնի մասով առաջին տեղ զբաղեցնող մասնակից ճանաչել «Մոսեսքո» ՍՊԸ-ին:

1. «Գնումների մասին» ՀՀ օրենքի 6-րդ հոդվածի 1-ին մասի 2-րդ կետի համաձայն՝ գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեն իրենց ներկայացրած գնային առաջարկի մինչև մեկ տոկոսը, բայց ոչ ավելի,

քան հիսուն հազար Հայաստանի Հանրապետության դրամը գերազանցող ժամկետանց պարտավորություններ:

«Ժակ և Գոռ» ՍՊԸ-ն, մասնակցելով «ԴԴ-ԳՀԱՊՁԲ-18/21» ծածկագրով գնանշման հարցման ընթացակարգին, թիվ 5 հավելվածով ներկայացրել է գնային առաջարկ (երկու չափաբաժինների մասով), և ներկայացրած գնային առաջարկի գինը (հանրագումարային) կազմում է 317 000 ՀՀ դրամ: Նշված չափաբաժնի մասով Ընկերությունը առաջին տեղ զբաղեցրած մասնակից է ճանաչվել 2-րդ չափաբաժնի մասով, որի համար առաջարկված գինը կազմում է 37 000 ՀՀ դրամ:

Համաձայն ՀՀ ԿԱ ՊԵԿ 12.05.2018թ. տրամադրած եզրակացության՝ «Ժակ և Գոռ» ՍՊԸ-ն հայտը ներկայացնելու օրվա դրությամբ ունեցել է ընդամենը 490 ՀՀ դրամ ապառք, որը համաձայն գնումների մասին ՀՀ օրենսդրության՝ չի գերազանցում օրենքով նախատեսված թույլատրելի շեմը, մասնավորապես Ընկերության կողմից թիվ 5 հավելվածով ներկայացրած գնային առաջարկի մեկ տոկոսը (թույլատրելի շեմը կազմում է 3 170 ՀՀ դրամ):

Մինչդեռ գնահատող հանձնաժողովի կողմից Ընկերության մոտ առկա ապառքի գումարը համեմատվել է Ընկերության կողմից 2-րդ չափաբաժնի մասով (հաղթած չափաբաժին) առաջարկված գնի հետ, այլ ոչ թե Ընկերության կողմից առաջարկված գնային առաջարկի հետ:

2018թ. մարտի 21-ին ընդունված «Նորմատիվ իրավական ակտերի մասին» ՀՀ օրենքի 41-րդ հոդվածի համաձայն՝ նորմատիվ իրավական ակտի նորմը մեկնաբանվում է՝ հաշվի առնելով նորմատիվ իրավական ակտն ընդունելիս այն ընդունող մարմնի նպատակը՝ ելնելով դրանում պարունակվող բառերի և արտահայտությունների տառացի նշանակությունից, ամբողջ հոդվածի, գլխի, բաժնի կարգավորման համատեքստից, այն նորմատիվ իրավական ակտի դրույթներից, ի կատարումն որի ընդունվել է այդ ակտը, տվյալ նորմատիվ իրավական ակտով սահմանված սկզբունքներից, իսկ այդպիսի սկզբունքներ սահմանված չլինելու դեպքում՝ տվյալ իրավահարաբերությունը կարգավորող իրավունքի ճյուղի սկզբունքներից:

Ընկերությունը գտնում է, որ ղեկավարվելով «Նորմատիվ իրավական ակտերի մասին» ՀՀ օրենքի 41-րդ հոդվածի պահանջներով՝ գնահատող հանձնաժողովը պետք է

«Գնումների մասին» ՀՀ օրենքի 6-րդ հոդվածի 1-ին մասի 2-րդ կետի պահանջները կիրառելի տառացի նշանակությամբ և «Ժակ և Գոռ» ՍՊԸ-ի մոտ առկա 490 ՀՀ դրամ ապառքը համեմատելու Ընկերության կողմից թիվ 5 հավելվածով ներկայացրած գնային առաջարկի (317 000 ՀՀ դրամ) հետ, ինչը տվյալ դեպքում չի կատարվել:

2. «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե.

ա) խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ) որպես ընտրված մասնակից հրաժարվել է պայմանագիր կնքելուց,

գ) հայտերը բացելուց հետո հրաժարվել է գնման գործընթացին հետագա մասնակցությունից:

«Ժակ և Գոռ» ՍՊԸ-ն Ընթացակարգի մասնակցության հայտի թիվ 2 հավելվածով հայտնել և հավաստել է, որ Ընկերությունը բավարարում է «ՀՀ դատական դեպարտամենտ» ՊԿ-ի կարիքների համար կազմակերպված «ԴԴ-ԳՀԱՊՁԲ-18/21» ծածկագրով գնման ընթացակարգի հրավերով սահմանված մասնակցության իրավունքի պահանջներին, սակայն ՀՀ ԿԱ պետական եկամուտների կոմիտեի կողմից ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 43-րդ կետի 3-րդ ենթակետով և 44-րդ կետով սահմանված կարգով տրամադրված եզրակացության համաձայն՝ «Ժակ և Գոռ» ՍՊԸ-ն հայտը ներկայացնելու օրվա դրությամբ ՀՀ պետական բյուջեի նկատմամբ ունի 490 ՀՀ դրամի ժամկետանց հարկային պարտավորություններ:

Արդյունքում արձանագրվել է, որ «Ժակ և Գոռ» ՍՊԸ-ի կողմից ներկայացված վերը նշված հայտարարությունը չի համապատասխանում իրականությանը, այլ կերպ ասած, առկա է Օրենքի 6-րդ հոդվածի 1-ին մասի 2-րդ կետով նախատեսված հիմքը, որի պարագայում Ընկերությունը չի կարող մասնակցել գնումների գործընթացին: Միևնույն ժամանակ համապատասխան հայտարարությունն իրականությանը չհամապատասխանող

գնահատվելու դեպքում, Ընկերության կարծիքով, չի կարող արձանագրվել մասնակցի կողմից Օրենքի 6-րդ հոդվածի 1-ին մասի 6-րդ կետով նախատեսված գնումների գործընթացին մասնակցելու իրավունք չունեցող մասնակիցների ցուցակում ներառելու որևէ հիմքի առկայություն (այդ թվում նաև «ա» ենթակետի), քանի որ մասնակիցը տվյալ դեպքում ի սկզբանե գնման գործընթացի շրջանակում չի ստանձնել որևէ պարտավորություն, որը խախտվել է, կամ թույլ չի տվել պայմանագրով նախատեսված որևէ պարտավորության խախտում, կամ չի հրաժարվել գնման գործընթացին հետագա մասնակցությունից, ինչպես նաև չի հրաժարվել պայմանագիր կնքելուց:

Ընկերության կարծիքով, «Ժակ և Գոռ» ՍՊԸ-ն ներկայացրել է հայտարարություն, որը ստուգվել է սահմանված կարգով և որի՝ իրականությանը չհամապատասխանելու հանգամանքը հիմք է հայտը մերժելու, այլ ոչ թե Ցուցակում ներառելու համար:

Ավելին՝ եթե 22.12.2010թ. ընդունված «Գնումների մասին» ՀՀ օրենքով մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու հիմք էր հանդիսանում նաև մասնակցի կողմից կեղծ տվյալի ներկայացումը, ապա 2016 թվականի դեկտեմբերի 16-ին ընդունված և ներկայումս գործող «Գնումների մասին» ՀՀ օրենքով «կեղծ տվյալի ներկայացումը» որպես մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու հիմք հանվել է օրենքի տեքստից:

«Գնումների մասին» ՀՀ օրենքի 2-րդ հոդվածի 23-րդ կետը սահմանում է, որ գնման գործընթացը գնում կատարելու նպատակով գնումների մասին Հայաստանի Հանրապետության օրենսդրությամբ նախատեսված ընթացակարգերի, իրավունքների և պարտականությունների իրագործմանն ուղղված գործողությունների ամբողջություն է, ներառյալ՝ գնումների պլանավորումը, գնման առարկայի բնութագրի հաստատումը, պայմանագրի կատարումը և կառավարումը:

Գնման գործընթացին մասնակցելը, որը սկսվում է մասնակցի կողմից հայտ ներկայացնելու պահից, հանդիսանում է մասնակցի իրավունքը: Միևնույն ժամանակ մասնակիցը գնման գործընթացի շրջանակներում ստանձնում է որոշակի պարտականություններ, որոնք ծագում են որոշակի փուլից հետո, մասնավորապես՝ ընթացակարգի արդյունքներով առաջին տեղ զբաղեցրած մասնակից ճանաչվելուց հետո:

Մինչև առաջին տեղ զբաղեցրած մասնակից ճանաչվելը, մասնակցի կողմից իրականացվող գործողություններն ուղղված են գնումների ընթացակարգին մասնակցության իրավունքի իրացմանը, որի շրջանակներում մասնակիցը դեռևս որևէ պարտավորություն չի ստանձնում:

Վետևաբար, հաշվի առնելով այն հանգամանքը, որ «Ժակ և Գոռ» ՍՊԸ-ի կողմից ներկայացված հայտարարությունը որակվել է որպես իրականությանը չհամապատասխանող, համաձայն Օրենքի վերը նշված հոդվածի, չի հանդիսանում մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու հիմք, քանի որ ՀՀ ԿԱ ՊԵԿ-ի կողմից տրամադրված եզրակացությամբ արձանագրված ապառքը չի գերազանցում գնումների մասին ՀՀ օրենսդրությամբ սահմանված թույլատրելի շեմը, ուստի Ընկերությունը գտնում է, որ «Ժակ և Գոռ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ընկերությունը ՀՀ գնումների հետ կապված բողոքներ քննող անձին խնդրել է «Ժակ և Գոռ» ՍՊԸ-ին չվերագրել «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված գնման գործընթացի շրջանակում ստանձնած որևէ պարտավորության խախտում, և վերջինիս չներառել գնումների գործընթացին մասնակցելու իրավունք չունեցող մասնակիցների ցուցակում:

Ընկերությունը, պատշաճ ծանուցված լինելով ՍՑ-ԱՄ-2018/97 ընթացակարգի շրջանակներում 02.07.2018թ. ժամը 10:20-ին, 06.07.2018թ. ժամը 11:20-ին և 09.07.2018թ. ժամը 10:55-ին հրավիրված նիստերի վերաբերյալ, 09.07.2018թ. ժամը 10:55-ին հրավիրված նիստին ապահովել է իր ներկայացուցիչների մասնակցությունը, ովքեր պնդել են վերոհիշյալ գրությամբ ներկայացված դիրքորոշումը:

### **3. ՀՀ դատական դեպարտամենտի կողմից ներկայացված փաստարկները և դիրքորոշումը.**

ՀՀ դատական դեպարտամենտը, ՀՀ ֆինանսների նախարարությանն ուղղված 21.06.2018թ. թիվ ԴԴ-3-Ե-4648 և 26.06.2018թ. թիվ ԴԴ-3-Ե-4774 գրություններով ՀՀ

Ֆինանսների նախարարությանն է ներկայացրել «ՀՀ դատական դեպարտամենտ» ՊԿՀ-ի կարիքների համար տրանսպորտային նյութերի ձեռքբերման նպատակով կազմակերպված «ԴԴ-ԳՀԱՊՁԲ-18/21» ծածկագրով ընթացակարգի շրջանակներում «Ժակ և Գոռ» ՍՊԸ-ի տվյալները՝ համապատասխան հիմքերով:

Պատվիրատուն, պատշաճ ծանուցված լինելով ՍՑ-ԱՄ-2018/97 ընթացակարգի շրջանակներում 02.07.2018թ. ժամը 10:20-ին, 06.07.2018թ. ժամը 11:20-ին և 09.07.2018թ. ժամը 10:55-ին հրավիրված նիստերի վերաբերյալ, 06.07.2018թ. ժամը 11:20-ին և 09.07.2018թ. ժամը 10:55-ին հրավիրված նիստերին ապահովել է իր ներկայացուցչի մասնակցությունը, ով հայտնել է, որ գնահատող հանձնաժողովն առաջնորդվել է գնումների մասին ՀՀ օրենսդրության պահանջներով և իրավաչափորեն մերժել է ընկերության հայտը, քանի որ հայտերի գնահատումն իրականացվում է ըստ առանձին չափաբաժինների:

#### **4. ՍՑ-ԱՄ-2018/97 ընթացակարգի քննության համար էական նշանակություն ունեցող փաստերը.**

ՍՑ-ԱՄ-2018/97 ընթացակարգի քննության համար էական նշանակություն ունեն հետևյալ փաստերը՝

1. ՀՀ դատական դեպարտամենտի կողմից «ՀՀ դատական դեպարտամենտ» ՊԿՀ-ի կարիքների համար տրանսպորտային նյութերի ձեռքբերման նպատակով կազմակերպվել է «ԴԴ-ԳՀԱՊՁԲ-18/21» ծածկագրով գնանշման հարցման ընթացակարգ (այսուհետ՝ Ընթացակարգ), որին մասնակցելու նպատակով 12.05.2018թ. հայտ է ներկայացրել «Ժակ և Գոռ» ՍՊԸ-ն:

2. Ընկերությունը հայտի թիվ 4 հավելվածով ներկայացրել է գնային առաջարկ, որի ընդհանուր գինը 1-ին չափաբաժի համար կազմել է 280 000 ՀՀ դրամ, 2-րդ չափաբաժնի համար՝ **37 000 ՀՀ դրամ:**

3. Ընկերությունը հայտի թիվ 2 հավելվածով հայտարարել և հավաստել է, որ բավարարում է «ԴԴ-ԳՀԱՊՁԲ-18/21» ծածկագրով գնանշման հարցման ընթացակարգի իրավերով սահմանված մասնակցության իրավունքի պահանջներին:

4. ՀՀ ԿԱ պետական եկամուտների կոմիտեի կողմից ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 44-րդ կետի հիման վրա 24.05.2018թ. տրամադրված եզրակացության համաձայն՝ **«Ժակ և Գոռ» ՍՊԸ-ն հայտը ներկայացնելու օրվա դրությամբ ունի ժամկետանց հարկային պարտավորություն՝ 490 ՀՀ դրամի չափով:**

5. Ընթացակարգի գնահատող հանձնաժողովի 29.05.2018թ. ժամը 12:00-ի նիստի թիվ 6 արձանագրությամբ կայացված որոշմամբ «Ժակ և Գոռ» ՍՊԸ-ի հայտը Ընթացակարգի 2-րդ չափաբաժնի մասով մերժվել է:

**5. ՀՀ գնումների հետ կապված բողոքներ քննող անձի հիմնավորումները և եզրահանգումը.**

ՀՀ գնումների հետ կապված բողոքներ քննող անձ՝ Մհեր Անանյանս, ուսումնասիրելով ՀՀ ֆինանսների նախարարության 27.06.2018թ. թիվ 03/26-3/11731-18 գրությունը, ՀՀ դատական դեպարտամենտի 21.06.2018թ. թիվ ԴԴ-3-Ե-4648 և 26.06.2018թ. թիվ ԴԴ-3-Ե-4774 գրությունները և կից փաստաթղթերը, հայտնում են հետևյալը.

«Գնումների մասին» ՀՀ օրենքի (այսուհետ՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի



միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

«Կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 32-րդ կետի 1-ին ենթակետի համաձայն՝ հրավերով նախատեսվում է նաև, որ մասնակիցը հայտով ներկայացնում է՝ իր կողմից հաստատված հայտարարություն՝ հրավերով սահմանված մասնակցության իրավունքի և որակավորման չափանիշներին իր համապատասխանության մասին:

Նույն կետի 18-րդ ենթակետի 1-ին պարբերության համաձայն՝ գնման ընթացակարգը չափաբաժիններով կազմակերպվելու դեպքում հայտերի գնահատումը և ընտրված մասնակցի որոշումն իրականացվում է ըստ առանձին չափաբաժինների:

Կարգի 43-րդ կետի 3-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարը էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև հրավերով «ֆինանսական միջոցներ» որակավորման չափանիշի գնահատման

համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը:

Կարգի 44-րդ կետի համաձայն՝ Կոմիտեն սույն կարգի 43-րդ կետի 3-րդ ենթակետով նախատեսված հարցումն ստանալու օրվանից երեք աշխատանքային օրվա ընթացքում էլեկտրոնային փոստի միջոցով տրամադրում է հարցման մասին տեղեկատվություն: Սույն կետով սահմանված ժամկետում կոմիտեից տեղեկատվության չստացման դեպքում մասնակցի ներկայացրած հայտարարությունները համարվում են իրականությանը համապատասխանող: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է օրենքով նախատեսված շեմը գերազանցող ժամկետանց պարտավորություններ կամ չի բավարարում հրավերով «ֆինանսական միջոցներ» որակավորման չափանիշի պահանջները, և պայմանագիրը կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրած տեղեկատվությունից տարբերվող տեղեկատվություն ներկայացվելու հանգամանքից: Սույն կետով նախատեսված որակավորման չափանիշի գնահատման ժամանակ հաշվի է առնվում սույն կարգի 47-րդ կետով նախատեսված ընթացակարգը:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում գրավոր տրամադրում է գնումների բողոքարկման խրոհողին: Սույն կարգի 44-րդ կետով սահմանված՝ մասնակցության իրավունք չունենալու հիմքերի առկայության դեպքում սույն կետով նախատեսված տվյալները չեն ներկայացվում լիազորված մարմին, եթե մասնակիցը կամ կոմիտեն լրացուցիչ տեղեկատվությունը

ներկայացրել է մինչև հայտերի գնահատման արդյունքների հաստատման նիստին հաջորդող երրորդ աշխատանքային օրը: Լրացուցիչ տեղեկատվությունը ներկայացվում է ինչպես առաջին տեղը զբաղեցրած մասնակցի կողմից՝ կոմիտեից ստացված գրավոր տեղեկատվությունը գնահատող հանձնաժողովին ներկայացմամբ, այնպես էլ կոմիտեի կողմից տրված նոր տեղեկատվությամբ: Ընդ որում, գնահատող հանձնաժողովի կամ քարտուղարի կողմից կոմիտեին կրկնակի հարցում չի կատարվում:

ՀՀ դատական դեպարտամենտի կողմից «ՀՀ դատական դեպարտամենտ» ՊԿՀ-ի կարիքների համար տրանսպորտային նյութերի ձեռքբերման նպատակով կազմակերպվել է «ԴԴ-ԳՀԱՊՁԲ-18/21» ծածկագրով գնանշման հարցման ընթացակարգ, որին մասնակցելու նպատակով 12.05.2018թ. հայտ է ներկայացրել «Ժակ և Գոռ» ՍՊԸ-ն:

Ընկերությունը հայտի թիվ 4 հավելվածով ներկայացրել է գնային առաջարկ, որի ընդհանուր գինը 1-ին չափաբաժի համար կազմել է 280 000 ՀՀ դրամ, 2-րդ չափաբաժնի համար՝ **37 000 ՀՀ դրամ:**

Մինևույն ժամանակ Ընկերությունը հայտի թիվ 2 հավելվածով հայտարարել և հավաստել է, որ բավարարում է «ԴԴ-ԳՀԱՊՁԲ-18/21» ծածկագրով գնանշման հարցման ընթացակարգի հրավերով սահմանված մասնակցության իրավունքի պահանջներին:

Ընթացակարգի գնահատող հանձնաժողովի 22.05.2018թ. ժամը 12:00-ի նիստի թիվ 5 արձանագրությամբ կայացված որոշմամբ «Ժակ և Գոռ» ՍՊԸ-ն ճանաչվել է առաջին տեղ զբաղեցրած մասնակցի **Ընթացակարգի 2-րդ չափաբաժնի մասով:**

Ընթացակարգի գնահատող հանձնաժողովի քարտուղարը Կարգի 43-րդ կետի 3-րդ ենթակետի հիման վրա 22.05.2018թ. համապատասխան հարցում է ներկայացրել ՀՀ ԿԱ պետական եկամուտների կոմիտե «Ժակ և Գոռ» ՍՊԸ-ի վերաբերյալ:

ՀՀ պետական եկամուտների կոմիտեի կողմից ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 44-րդ կետի հիման վրա 24.05.2018թ. տրամադրված եզրակացության համաձայն՝ **«Ժակ և Գոռ» ՍՊԸ-ն հայտը ներկայացնելու օրվա՝ 12.05.2018թ. դրությամբ ունի ժամկետանց հարկային պարտավորություն՝ 490 ՀՀ դրամի չափով, որը գերազանցում է Ընկերության կողմից 2-րդ չափաբաժնի մասով ներկայացված գնային առաջարկի մեկ փոկոսը:**

Ընթացակարգի գնահատող հանձնաժողովի 29.05.2018թ. ժամը 12:00-ի նիստի թիվ 6 արձանագրությամբ կայացված որոշմամբ «Ժակ և Գոռ» ՍՊԸ-ի հայտը 2-րդ չափաբաժնի մասով մերժվել է:

Այսպիսով՝ ՀՀ ԿԱ պետական եկամուտների կոմիտեի կողմից 24.05.2018թ. տրամադրված եզրակացության համաձայն՝ **«Ժակ և Գոռ» ՍՊԸ-ն հայտը ներկայացնելու օրվա դրությամբ ՀՀ պետական բյուջեի նկատմամբ ունեցել է 490 ՀՀ դրամի չափով ժամկետանց հարկային պարտավորություն, որը գերազանցում է «Գնումների մասին» ՀՀ օրենքի 6-րդ հոդվածի 1-ին մասի 2-րդ կետով նախատեսված շեմը: Մինչդեռ Ընկերությունը հայտի թիվ 2 հավելվածով հայտարարել և հավաստել է, որ բավարարում է «ԴԴԳՀԱՊԶԲ-18/21» ծածկագրով գնանշման հարցման ընթացակարգի հրավերով սահմանված մասնակցության իրավունքի պահանջներին:**

«Գնումների մասին» ՀՀ օրենքի 6-րդ հոդվածի 1-ին մասի 2-րդ կետի համաձայն՝ գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեն իրենց ներկայացրած գնային առաջարկի մինչև մեկ տոկոսը, բայց ոչ ավելի, քան հիսուն հազար Հայաստանի Հանրապետության դրամը գերազանցող ժամկետանց պարտավորություններ:

Օրենքի 6-րդ հոդվածի 1-ին մասի 6-րդ կետի «ա» ենթակետի համաձայն՝ **մասնակիցը ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է գնման գործընթացի շրջանակում ստանձնած պարտավորությունը, որը հանգեցրել է գնման գործընթացին փվյալ մասնակցի հեփագա մասնակցության դադարեցմանը:**

ՀՀ ֆինանսների նախարարությունը, որպես «Գնումների մասին» ՀՀ օրենքի 2-րդ հոդվածի 13-րդ կետով նախատեսված լիազորված մարմին, «Գնումների մասին Հայաստանի Հանրապետության օրենսդրության մեջ տարաբնույթ ընկալվող դրույթների վերաբերյալ» 09.10.2017թ. թիվ Պ-2 պաշտոնական պարզաբանման մեջ նշել է, որ եթե Կոմիտեի կողմից տրամադրված եզրակացությամբ արձանագրվում է, որ առաջին տեղ զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է Օրենքով նախատեսված շեմը

գերազանցող ժամկետանց պարտավորություններ և մասնակիցը կամ Կոմիտեն լրացուցիչ տեղեկատվությունը պատվիրատուին չի ներկայացրել մինչև հայտերի գնահատման արդյունքների հաստատման նիստին հաջորդող երրորդ աշխատանքային օրը, ապա անկախ նշված ժամկետից հետո մասնակցի կողմից լրացուցիչ տեղեկատվություն ներկայացնելու հանգամանքից, պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին:

Ընդ որում, այս դեպքում նկատի ունենալով, որ մասնակիցը հայտով ներկայացնում է հայտարարություն հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով Օրենքով նախատեսված շեմը գերազանցող ժամկետանց պարտավորություններ չունենալու վերաբերյալ, սակայն Կոմիտեի կողմից տրամադրված տեղեկատվությամբ արձանագրվում է ժամկետանց պարտավորությունների առկայությունը, **ուստի այդ հանգամանքը դիտարկվում է որպես մասնակցի կողմից գնման գործընթացի շրջանակում սրանձնած պարտավորության խախտում, որի արդյունքում դադարեցվում է այդ մասնակցի հետագա մասնակցությունը գնման գործընթացին և մասնակիցը ներառվում է գնումների գործընթացին մասնակցելու իրավունք չունեցող մասնակիցների ցուցակում:**

Այսպիսով՝ հաշվի առնելով վերոգրյալը և հիմք ընդունելով ՀՀ ԿԱ պետական եկամուտների կոմիտեի 24.06.2018թ. տրամադրած եզրակացությունը, գտնում եմ, որ «Ժակ և Գոռ» ՍՊԸ-ն «ԴԴ-ԳՀԱՊՁԲ-18/21» ծածկագրով գնանշման հարցման ընթացակարգի շրջանակներում թույլ է տվել Օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված պարտավորության խախտում: Ինչ վերաբերում է Ընկերության այն պնդմանը, որ ժամկետանց հարկային պարտավորության գումարի չափը պետք է համեմատվեր ոչ թե 2-րդ չափաբաժնի մասով ներկայացված այլ գնային առաջարկի այլ գնային առաջարկի հանրագումարի (1-ին և 2-րդ չափաբաժիններ) հետ, ապա գնում եմ, որ նման պնդումն անհիմն է, քանի որ ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 32-րդ կետի 18-րդ ենթակետի 1-ին պարբերության համաձայն՝ **գնման ընթացակարգը չափաբաժիններով կազմակերպվելու դեպքում հայրերի գնահատումը և ընտրված մասնակցի որոշումն իրականացվում է ըստ առանձին չափաբաժինների:**

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

**Ո Ր Ո Շ Ե Ց Ի**

Հայաստանի Հանրապետության ֆինանսների նախարարության 27.06.2018թ. թիվ 03/26-3/11731-18 գրությամբ՝ «Ժակ և Գոո» ՍՊԸ-ին (ՀՎՀՀ՝ 03012667) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը բավարարել և «Ժակ և Գոո» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների հետ կապված բողոքներ քննող անձի որոշումն ուժի մեջ մտնելու օրվանից հաշված երկու տարի ժամկետով:

ՀՀ գնումների հետ կապված բողոքներ քննող անձի որոշումն իրավապարտադիր է:

ՀՀ գնումների հետ կապված բողոքներ քննող անձի որոշումը կարող է բողոքարկվել դատական կարգով:

**Գնումների հետ կապված  
բողոքներ քննող անձ՝**



**ՄՀԵՐ ԱՆԱՆՅԱՆ**